

- प्रधानमंत्री नरेन्द्र मोदी कह्यो— काले ऊँ लागू व्हेवण वाळा जीएसटी सुधारां सगळा तबकां अर कारोबारियां ने फायदो व्हेलां
- केन्द्रीय गृहमंत्री अमित शाह जोधपुर मांय पारसमल बोहरा नेत्रहीन महाविद्यालय रा नुवां भवन री नीव धरी— कह्यो— दिव्यांगजन ने हर हलकां मांय आगे बधावण सारू सगळा री मदद जरूरीं
- प्रदेशभर मांय सेवा पखवाड़ा रा तैत न्यारी-न्यारी ठौड़ा नमो युवा रन मैराथन समेत केई आयोजन व्हेयां
- शारदीय नवरात्र काले ऊँ-न्यारा-न्यारा शक्ति पीठां अर मिन्दरां मांय धार्मिक आयोजन व्हेलां

000

प्रधानमंत्री नरेन्द्र मोदी अबै ऊँ थोड़ी देर पैला देश ने सम्बोधि करता कह्यो के आगली पीढ़ी रा जीएसटी सुधार नवरात्रां रे पैले दिन काले ऊँ लागू व्हेलां श्री मोदी कह्यो के जीएसटी बचत उत्सव काले ऊँ सरू व्हेलां लोग कम कीमत माथे आप री पसंद रो सामान खरीद सकेलां वणा कह्यो के देश री विकास गाथा आं सुधारां से साथै बदल जायेलां नौजवान, नुवां मझला तबका, काश्तकारां, महिलावां अर कारोबारियां ने ई बचत उत्सव ऊँ घणो फायदो व्हेलां वणा कह्यो के हर राज्य देश रा विकास री जात्रा मांय बरोबर रो साझेदार व्हेलां

.....  
प्रधानमंत्री कह्यो के वां री सरकार टैक्स प्रणाली ने सरल बणाया हैं वणा बतायो के साल 2014 मांय सत्ता मांय आवण रे पछे राज्यां अर हितधारकां ऊँ राय रे पछे वां री सरकार वस्तु अर सेवाकर ने वरीयता दी हैं वणां कह्यो के जरूरी चीजां, दवाइयां अर स्वास्थ्य बीमा पांच फीसदी टैक्स रा दायरा मांय व्हेलां प्रधानमंत्री खुशी जतावता कह्यो के लारला 12 सालां मांय 25 करोड लोग गरीबी ऊँ उबर्या हैं वणा कह्यो के जीएसटी कम होवण ऊँ मझला तबकां रा सपना पूरा करणा और सरल व्हेलां

.....  
अठिने प्रदेश मांय 22 ऊँ 29 सितम्बर तांई जीएसटी बचत उत्सव मनायो जायेलां ई अभियान रो मकसद जीएसटी दरां मांय कटौती रो फायदो लोगां तांई पूगावण रे साथै ई करोबारी तबका ने प्रेरित करणो हैं मुख्यमंत्री भजनलाल शर्मा आज जयपुर मांय जीएसटी दरां रा बारा मांय मंत्रियां अर विधायकां री वीडियो कॉन्फ्रेंस रे मार्फत मीटिंग लेवण पछे आ जाणकारी दीं वणा कह्यो के केन्द्र सरकार कानी ऊँ देशवासियां ने तिवारां रे शुभ मौके जीएसटी दरां मांय कमी री अनूठी सौगात दीरीजी हैं इण रो पूरो फायदो तैय करण सारू जनजागरुकता जरूरी हैं श्री शर्मा मंत्रियां अर विधायकां ने निर्देश दिया के अभियान रा बगत वे आप-आप रा हलकां मांय जीएसटी बचत उत्सव रो घणो प्रचार-प्रसार करे अर लोगां मांय जाग जगावें

000

केन्द्रीय गृहमंत्री अमित शाह आज जोधपुर पूग्यां वणा राम नगर चोखा मांय पारसमल बोहरा नेत्रहीन महाविद्यालय रा नुवां भवन री नीव धरी  
ई मौके जळसा मांय बोलता श्री शाह कह्यो के समाज सरकार अर स्वयं सेवी संस्थावां मिल ने तैय करे तो दिव्यांगजन हर हलका मांय आगे बध सके हैं

.....  
ई मौके मुख्यमंत्री भजन लाल शर्मा, केन्द्रीय पर्यटन अर संस्कृति मंत्री गजेन्द्र सिंह शेखावत ई मौजूद रियां

000

प्रदेशभर मांय सेवा पखवाड़ा रे तैत आज न्यारी-न्यारी ठौड़ां नमो युवा रन आयोजित करी ज्यीं लोकसभा अध्यक्ष ओम बिरला कोटा मांय उम्मेद सिंह स्टेडियम ऊँ रन ने रवाना कर्यां वटे ई केन्द्रीय मंत्री भूपेन्द्र यादव अलवर मांय नमो युवा रन ने हरी झंडी दिखाई जोधपुर मांय केन्द्रीय मंत्री गजेन्द्र सिंह शेखावत गौशाला मैदान ऊँ नमो युवा रन मैराथन ने रवाना कर्यां मैराथन मांय केन्द्रीय मंत्री श्री शेखावत, सांसद राजेन्द्र गहलोत समेत जन नुमाइन्दा अर नौजवान हिस्सो लियों नशा मुक्त भारत थीम माथे व्हे ई दौड़ ने जयपुर रा अमर जवान ज्योति ऊँ मुख्यमंत्री भजनलाल शर्मा हरी झंडी दिखाई इण रे पछे मुख्यमंत्री सीकर रा सांवली पूग्यां जठे वणा हजारां नौजवानां ने नशा ऊँ दूर रहवण री शपथ दिरायीं सेवा पखवाड़ा रा तैत तहत नशा मुक्ति शपथग्रहण कार्यक्रम मांय बोलता वणा नौजवानां ऊँ किणी तरह रो नशो नी करण री अरज करीं साथै ई कह्यो के युवावां रा सपना ने साकर करण सारु केन्द्र अर राज्य सरकार पूरी तरह तियार हैं

.....

झुंझुनूं मांय भी मैराथन मांय जिला कलेक्टर डॉ. अरुण गर्ग ठावां रहवण वाळा प्रतिभागियां ने इनाम दियां जैसलमेर मांय ई निःशुल्क चिकित्सा शिविर अर नमो युवा रन रो आयोजन करी ज्यीं भीलवाड़ा मांय भाजपा दफ्तर माथे लगायी ज्यी नुमाइश रो उद्घाटन सांसद सी.पी. जोशी कर्यां

000

प्रधानमंत्री नरेन्द्र मोदी रा 75 वां जन्मदिन रे मौके वां री जीवनी माथे फिल्म "चलो जीते हैं" रा सिनेमाघरां अर स्कूलां मांय दिखायी जावें न्यारा-न्यारा जिला मांय दिखायी जाय री ई फिल्म री लोगां सराहवना करे हैं भीलवाड़ा फिल्म देखण रे पछे, देखण वाळां नौजवान मनीष जांगिड़ इण ने प्रेरणाजोग बतायां

.....

शारदीय नौरता कल ऊँ सरु व्हे रहया हैं आज सर्व पितृ अमावस रे साथै ई श्राद्ध पक्ष पूरण व्हे जायेलां नवरात्रा घटथापना रे साथै ई नौ दिनां ताई माँ दुर्गा रा न्यारा-न्यारा रूपां री उपासना करी जायेलां इण रे साथै ई न्यारा-न्यारा धार्मिक आयोजन ई व्हेलां देवी मिंदरां ने मोवणी रोशनी अर फूलां ऊँ सजाया जावें नवरात्रि माथे मेळा ई भरीजेलां रा आमेर मांय शिला माता शक्ति पीठ मांय नवरात्र पर्व ने ले र खास तैयारियां करी जावें उत्तर भारत रा नामी शक्ति पीठ करौली रा कैला देवी धाम मांय घटथापना रे साथै काले ऊँ शारदीय नवरात्र मेळो सरु व्हेलां म्हाणा खबरनवीस बतायो के मेळा मांय राजस्थान, मध्यप्रदेश, उत्तर प्रदेश समेत केई राज्यां रा सिरधालू मेळा व्हेलां

.....

सिरोही जिला मांय ई नौरता ने ले र लोगां मांय घणो उमाव निज़र आवें मिन्दरां री खास सजावट रे साथै ई गरबा आयोजन ने ले र तैयारियां करी जावें और ब्यौरो म्हाणा खबरनवीस ऊँ —

.....

बाड़मेर जिला मांय वीरातरा मांय वांकल धाम अर बाड़मेर रा गढ मिन्दर मिन्दर समेत जिला रा खास देवी मिन्दरा माय सजावट करी ज्यी हैं

000

सिरोही जिला मांय मांय "सशक्त नारी-सशक्त परिवार अभियान" रे तैत स्वास्थ्य शिविरां रो आयोजन कर्यो जावें आं शिविरां मांय महिलावां अर टाबरा रा स्वास्थ्य रा बारा मांय जांच करी जावें ब्लॉक चिकित्सा अहलकार डॉ. भूपेन्द्र प्रताप सिंह बतायो के अभियान रो मकसद महिलावां ने स्वास्थ्य रे प्रति जागरूक करणो टाबरां री बीमारियां री बगतसर पीछाण अर परिवार ने मजबूत अर हिफाजती बणावणो हैं

000

आकाशवाणी ऊँ हर महीना प्रसारित कर्यो जावण वाळो खास कार्यक्रम मन की बात 28 सितम्बर ने प्रसारित कर्यो जावेलो प्रधानमंत्री नरेन्द्र मोदी रा ई कार्यक्रम री आ 126वीं कड़ी व्हेलां ई सारु आप ई मुफ्त नम्बर 1800-11-7800 माथे 26 सितम्बर ताई राय दे सको हों ई रे अलावा नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके हैं

000

एशिया कप टी-20 क्रिकेट टूर्नामेंट मांय आज एकर फैरु भारत अर पाकिस्तान री टीमां आमी सामी व्हेलां सुपर 4 रा दूजा मुकाबला मांय ओ मैच दुबई मांय रात आठ बज्यां ऊँ सरु व्हेलां आज रो मुकाबलो जीतण वाळी टीम फाइनल री दौड़ मांय भेळी रहवेलां भारत लारला हफ्तां ग्रुप-स्टेज मुकाबला मांय पाकिस्तान माथे सात विकेट ऊँ शानदार जीत हासिल करी हीं

000